

**COVID-19: Golongan miskin perlu lebih 10 tahun untuk pulih pasca pandemik – Laporan
Astro Awani
25 Januari 2021
APTN**

KUALA LUMPUR: Seribu individu paling kaya di dunia berjaya mengatasi kerugian akibat COVID-19 dalam masa hanya sembilan bulan.

Namun bagi golongan termiskin dunia, ia memerlukan lebih dari satu dekad untuk pulih.

Laporan itu dikeluarkan Oxfam International pada Isnin bertajuk 'The Inequality Virus' yang diterbitkan pada hari pembukaan Forum Ekonomi Sedunia (WEF) 'Davos Dialogues'

Ini menunjukkan bahawa COVID-19 berpotensi untuk meningkatkan ketidaksamaan ekonomi di hampir setiap negara secara serentak.

Menurut Pengarah Eksekutif Oxfam International, Gabriela Bucher, perkara itu merupakan pertama kalinya terjadi sejak rekod bermula lebih satu abad lalu.

"Ketika pandemik, 10 jutawan menjana setengah trilion dolar dalam tempoh itu yang cukup untuk mencegah sesiapa pun di seluruh dunia daripada terjerumus dalam kemiskinan, selain cukup untuk membayar vaksin untuk semua orang.

“Sebaliknya, kita tahu jutaan orang hilang pekerjaan, mata pencarian dan rumah mereka.

"Jadi perbedaannya sangat besar dan kita tahu bahwa tahun ini ketidaksamarataan akan meningkat hampir setiap negara di dunia dan kenaikan terbesar sejak rekod bermula," katanya.

Laporan itu berkata peningkatan ketidaksamaan bererti tempoh yang diperlukan untuk golongan miskin kembali ke tahap prapandemik adalah 14 kali lebih lama berbanding 1,000 individu paling kaya dunia.

Bucher berkata beliau percaya akses kepada vaksinasi coronavirus sangat penting sebagai jambatan terhadap ketidaksamaan ini, serta cukai yang dapat digunakan untuk pemulihan pandemik.

"Jadi, kami rasa kita perlu mengukur apa yang kita hargai selain KDNK.

"Mari kita fikirkan tentang apa yang penting untuk orang ramai seperti kesejahteraan, pelaburan dalam kesihatan, vaksin rakyat, pastikan vaksin diberikan kepada semua orang.

"Pastikan kita kenakan cukai sewajarnya seperti Argentina, sebagai contoh. Mereka telah mengenakan cukai kekayaan secara 'one-off' kepada rakyat yang akan membayar untuk pemulihan wabak.

"Kita perlu melihat bagaimana ini benar-benar peluang untuk melakukan transformasi mengenai cara kita berfikir mengenai ekonomi," ujarnya.

Oxfam adalah gabungan 20 organisasi kebajikan bebas yang memfokuskan kepada membanteras kemiskinan global yang ditubuhkan pada tahun 1942 dan diketuai oleh Oxfam International.

© 2021 Astro AWANI Network Sdn. Bhd. (535275-D) All Rights Reserved.

Source: <https://www.astroawani.com/berita-dunia/covid19-golongan-miskin-perlu-lebih-10-tahun-untuk-pulih-pasca-pandemik-laporan-279621>